

LA USC DI LADINS - MERCOLEDI' 23 DICEMBRE 2020

SOZIETÀ

Per Nadèl sarà la scolina a ruèr a cèsa de nesc bec!

La desposizioni sanitàres à smendrà debel ence la sacotanta scomenzadives de gran utol per fèr percacenta la relazion anter l'istituzion e la families ma la scolines provinzièles à troà na soluzion



L lurier fat dai bec de la scolina de Soraga.



Un di dessegnes fac dai bec de la scolina de Pera.



L'èlber bel fornì sù fora da la scolina de Cianacei.

La relazion anter scola e familia l'ha na emportanza fundamentèla te la scolina. Relazion vel dir confront, barat educatif, coleament, neva aleanzes e la taca con n enconter de inseriment, dapò se va inant con outra scontrèdes ence via per l'an, ma no demò.

La relazion e l'pat educatif anter l'istituzion e la familia se fèsc sù e se renforza ence di per di, coi barac che pel esser ence apontin vigni di anter insegnant e genitor: canche se rua a scola da doman e da sera canche l'è l moment de jir da nef a cèsa. Chest soraldut per i più picoi.

Dapò l'è duta la scomenzadives che la scola porta inant per tor ite la families te la realtà scolastica. Scontrèdes per la prejentazion del projet pedagogich, che doventa

ocajions de confront ma ence momenc preziosc per arvejinèr i genitores a la ativitàes educatives e ge moscèr chel che se é do che se fèsc a scola e soraldut con coluna finalità.

L'è ence i momenc convivièi, Nadèl, Carnascèr ... momenc olache se é a scola duc ensema, gregn e picoi, per tor dant dut chel che i picoi à enjgnà per mami e papi, opura olache i protagonisè é apontin i genitores, pèrt viva de la scola.

Ma chest an co se fèjèl?

Chest an tel respet del protocol sanitàr e per l ben de duc, i contac, ence chi da vigni di, i cogn esser limitè. I genitores no pel ite te duc i ambienc de la scolina e no se pel se fermèr per massa temp.

L barat é per forza più asvelt e i genitores no i pel veder semper la documentazion che te noscia scolines per solit la vegnia tachèda sui parees apontin per la families.

E la ocajions convivièles duc ensema? E la festa de Nadèl?

Chesta la domanes che jà al scomenz de l'an de scola insegnanc, families e bec à cognù se fèr.

Co podone esser bogn de mantegnir vif n leam strent con la families, fundament de l'azion educativa de la scolina? Chesta domana é ressonèda tel colege dozenc de la insegnantes de Cianacei, Pera e Soraga con la coordinadora pedagogica Tatiana Soraperra.

E sobito l'è stat l'ativazion! Se la familia podarà ite mingol de manco te noscia scolina, sarà la scolina che «jirà a cèsa» de nesc picoi!

La insegnantes à pissà de ge manar online ite per anter a la families na documentazion de la ativitàes. Dai retrac di alestiment di ambienc che i genitores no veit più di per di, al «diario di bordo» de la ativitàes educatives, al contèr ence esperienzes e progress significatives de n bez soul e/o de dut l grop!

Chel che la trei scolines vel fèr l'è tegnir na fenestra avèrta, a na vida che mami e papi posse veder e se fejurèr chel che vif sie picol.

Chest l'è stat un di temes che la scolines de Cianacei, Pera e Soraga à tout dant coi genitores la setemèna passèda, endèna l'enconter per la

prejentazion del Projet Pedagogich, chest an se sà ben stat online travers la piataforma Meet!

E per Nadèl l pensier l'è stat l medemo: sarà la scolines a ruèr te familia con desvaliva proponetes, vedù che no sarà possibol orir i ujes de la strutura per n moment de festa duc ensema!

A Soraga l'è stat chi che à realisà n video olache i bec conta la ativitàes fates ti ultimes tempes: la cripela per la Cassa Rurala del paisc, i biscoc de la chega, l barat de letres con Sèn Nicolò che chest an per via del Covid no l'ha podù vegnir a troèr i bec!

Encè te la scolina de Pera l'è stat realisà n video olache la oujes di bec se enterza a cianties douces endèna che se veit la imagines de si dessegnes e creazioni; n video che ruarà ensin a la Cèsa de Paussa de Vich perche te chest moment cosci senester i bec vel ge manèr n don e n «braciacol» apontin a chisc giaves che più che duc padesc chesta condizion de isolament!

L'è n video ence per chel che revèrda Cianacei, che regoi la cianties ciantèdes dai bec ti cater lengac che vegn durà a scola, talian, ladin, todesch e inglese! E vedù che i genitores no à podù se troèr, descheche oramai l'era usanza, per realisèr ensema velch picola decorazion de Nadèl, ogne familia à portà da cèsa sie lurier e l'ha tacà su l'èlber fora da la scolina: «Simbol de union e colaborazion», à deschiari la insegnantes!

Ei, percheche mai desche ades l'è de besegn de se sentir vejins, ence se da dalonc!

La scolines de Cianacei, Pera e Soraga ensema a duta la Scola Ladina de Fascia, vel ge manèr a duc i più bie augures per chest Nadèl! **TS/CRIM**